



Synfocity = 503

mail us at : mzsynfo@gmail.com; mizoramsynod@gmail.com - Phone - 2314648

4th September, 2014

☐ Zu leh Unique Identification (UID) zir

September 2, 2014 (Thawhlejni) khan nilengin Synod Revival Department buatsaihin Synod Revival Speaker-te pualin Zu leh Unique Identification (UID) chungchang zir hona seminar neih a ni. He programme-ah hian Synod Revival Speaker-te an kal tha hle.

Chawhma lamah Rev. Lalzuithanga, Executive Secretary i/c Revival kaihhraina hnuai ah Zu chungchang zir ho a ni a, Rev. Chuauthuama'n paper buatsaihin a zirtir a, sawihona hun tha tak hman zui niin Zu chungchanga Mizoram Presbyterian Kohhran pawm dan leh zirtir dan te sawi lan a ni a. Bible-in zu a sawi dan te zir hovin hlawk takin hun an hmang.

Chawhnu lamah Rev. R. Lalnuntluanga kaihhraina hnuai ah India sawrkarin khua leh tuite chhinchhiahna kalphung thar a siam Unique Identification (UID) chungchanga Upa Bonny Lalrindika paper buatsaihir ho lehin paper buatsaihtu Upa Bonny Lalrindika hian a zirtir nghal a. UID chungchanga thu dik lo theh darhtute avanga Kohhran mite chiaid dan te, khua leh tuite tih tur ang pawh ti thei lova athlak taka bumna thanga awk mekte tanpui dan tur zir ho a ni.

A bikin UID chungchanga pawm dan dik lo, sakawlh nena hmehbela sakawlh nun Bible-in a sawi dan pawh zir chiang lova UID hlauhna chi tuhtute thiltih chu sawihonaah uar taka sawi chhuah niin he thil hi hlauh tur awm lo, sakawlh nena inanna pawh nei lo, technology thar hmanga sawrkarin khua leh tui chhinchhiahna awlsam zawk leh rintlak zawk a siamna hmanrua mai a nih thu leh, sakhaw nun nena inzawmna pakhatmah nei lo a nihzia sawi darh pawimawhna te inhrilh hriat a ni bawk.

☐ Finance Committee vawi 110-na a thu

Vaviin (Sept. 4, 2014) chawhma dar 10:00 khan Synod Office-a Committee Room No. II-ah Synod Finance Committee a thu. He Committee hi a vawi 110-na niin Moderator Rev. K. Lalhmuchhuakan a kaihruai a, member an tel tha hle. Tun tum thutkhawmah hian Foreign Contribution hman dilna leh Budget Diversion/Reappropriation dilna te leh thil pawimawh engmaw zat ngaihtuah a ni.

Finance Committee-in kum 2013-14 Account hrang hrang audit report atanga bawhzui ngai a tihte bawhzui fel a nih tawh thu te, Audit Reports leh Statement of Account te SEC-in a pawm fel tawh thu te, sawmna anga Bial sarih leh Kohhran mal pakhat Finance campaign leh training buatsaihir a nih thu te, Delhi-ah in sak zawh peihsa leh a hmun chhawm zawng zawng cheng nuai sangkhat zathum sawmsarih man lei a nih thu te inhriattir a ni.

April atanga August thla chhunga sum hmuh tawh chu Pastoral-ah Rs.28,01,57,344.00 (Nuai sanghnih zariat pakhat singnga sangsarih zathum sawmli leh pali) a ni a, chu chu Budget atangin za zela 34.33 a ni. Mission lamah Rs.22,17,89,818 (Nuai sanghnih zahnih sawmpasarih singriat sangkua zariat sawmpariat) hmuh tawh a ni a, chu chu Budget atangin za zela 42.74 a ni. A vaviin Pastoral leh Mission sum hmuh belhkhawm chu Rs.50,19,47,162.00 (Nuai sangnga sawmpakua singli sangsarih za sawmruk leh pahnih a ni a, chu chu budget pum pui atangin za zela 37.60 a ni.

Presbytery huapa sum chhun luh tawh chinah a sang ber chu Aizawl Bethel Presbytery an ni a, cheng vaibelchhe 5, maktaduai 6, nuai 3, sing 4, sang 4, zathum, sawmkua leh pasarih an chung lut tawh a ni. A dawttu chu Aizawl Central Presbytery niin cheng vawibelchhe 5, maktaduai 2, nuai 9, sing 5 sang 6 zathum leh sawmkua an chung lut tawh a ni.

☐ Zin

◆ August 30 & 31, 2014 khan Kohhran indan chungchangah Upa H. Zoliana, Synod Secretary leh Rev. Dr. R. Lalbiakmawia, Finance Officer-te Bungtlangah an kal.

◆ September 6 - 25, 2014 chhung hian Rev. Lalzuithanga, Senior Executive Secretary chu PCI Goodwill visit to Wales programme-ah a kal ang.

◆ September 2 - 5, 2014 chhung hian Saiha, Lawngtlai leh Thenzawl Presbyterian English School-te tlawh turin Upa D.P. Biakkhuma, Supervisor of Schools a kal.

☐ KTP Quiz chungchang

Synod Information & Publicity Department (Synfo) in Aizawl khawpui Presbytery huam chhunga Branch KTP Quiz a buatsaihir tur HRUAINA ENG QUIZ chu inbuatsaihna kalpui mek zel a ni a, quiz a tel tur hian hmung pek luh hun a tawp tawh a, Branch 78 in hmung an pe lut a ni.

October 14, 2014 (Thawhlejni) zanah Zosaphluia Hall-ah intihsiakna hi tan tur a ni a, a tan tirh zan bak chu Ningani leh Zirtawpni zanah zel neih a ni ang. Branch tin atangin mi pahnih zel tel tur a ni a, Elimination Round bikah heng mi pahnihte pui turin Branch tin atangin mi 20 zel tel theih a ni ang a, heng mi 20 te chhan tur bik zawhna pawh siam a ni ang. Round sanga lut turin a pumpuia ti tha zel thlan an ni ang.

Inelna tur Subject te :

a) **Bible (Mizo (Lushai) O.V. Reference)** - 40% (Elimination Round -ah chuan Rom atangin zawhna siam a ni ang a, Round dangah chuan Luka te, Tirhkohte Thiltih te leh Thuthlung Hlui atangin Bu khat, hei hi nakinah la tihchian tur a ni ang.)

b) **Mizoram Presbyterian Kohhran Chanchin** by Rev. Lalchhuanliana -20%

c) **KTP Chanchin – KTP Souvenir ‘Lamtluang’** by CKTP – 20%

d) **General Knowledge (Current affairs)** – 20%

Round awm dan tur hetiang hian duan a ni :

- ◆ Elimination Round : All
- ◆ Second Round : Elimination Round a ti tha 20 ten Second Round an lut ang.
- ◆ Third Round : Second Round a ti tha 10 ten Third Round an lut ang.
- ◆ Final Round : Third Round a ti tha 3 in Final Round an lut ang.

Quiz inelna lawmman atan pakhatnain Rs. 1,00,000/-, pahnihnain Rs. 70,000/- leh pathumnain Rs. 50,000/- bakah Trophy mawi tak an dawng ang. Hruaina Eng Quiz hi Hruaina Eng TV Channel-ah Live a pekchhuah tum a ni. *Contd...*

☐ **Synod Mission Board**

- ◆ September 3 - 12, 2014 chung hian Home Mission South Tlabung Bial School tlawh turin Pu H. Vanlalchhuanga, Supervisor of Schools a kal ang. A zin chung hian Tuichawng, Tlabung, Diblibagh, Tuikawi, Malsury, Putlungasih leh Zawlpui School te a tlawh ang.
- ◆ Barak Area Church & Mission-a Synod rawngbawlina chuan hma a sawn zel a. September 4, 2014 thleng hian ringthar baptima chang mi 247 an tling ta.

☐ **Kristian Thalai Pawl**

- ◆ September 6, 2014 (Inrinni) hian Ailawng Branch Diamond Jubilee hmanpuiin CKTP Committee members T.Upa T. Lalawmpuia leh Pu Vanlalpeka an kal ang.
- ◆ Central KTP Committee chuan Synod Choir (2014 -2016) member turte a ruat fel ta a. September 5, 2014 (Zirtawpni) tlai dar 4:30-ah Synod Conference Centre-ah a hlanna inkhawm neih a ni dawn a, zanriah an kilho nghal ang.

SYNOD CHOIR HLANNA PROGRAMME:

A hun : September 5, 2014; 4:30 pm

A hmun : Synod Conference Centre

Chairman : Pu Samuel Laldingliana, Asst. Leader CKTP
 Report & Inhmelhriattirna : Upa Zonunmawia, General Secretary CKTP
 Thusawi : Pu R. Lalruatkima, Director, Mizoram Synod Choir
 Hlanna : Rev. K. Lalhmuchhuaka, Synod Moderator
 Thuchah : Rev. J. Lalremsiama, Leader CKTP
 Banna : Chairman

- ◆ KTP General Conference thurel - KTP member thalai zawkte hip khawm thei tur programme CKTP-in ngaihtuah rawh se, tih bawhzuiin CKTP Committee chuan ruahmanna a siam tawh a. Ruahmanna ang chuan December 5, 2014-ah Sipai Lammual emaw hmun remchang dangah emaw PRAISE '14 buatsaih tum a ni a. Hemi atana mawhphurtu tura ruatte chu September 7, 2014 (Pathianni) tlai dar 3:30-ah Chanmari Kohhran Hall-ah an inhmukhawm ang.

☐ **Beihruai**

Presbyterian Kohhran chuan September 1, 2014 atang hian Beihruai thla an hmang tan ang. September 1 - 7 chung hian 'Ramthar Hapta' hman a ni ang a, September 22 – 27 hian 'Kristian Chhungkaw Hapta' hman a ni bawh ang, September 28-ah 'Nu leh Pa Ni leh Kristian Chhungkaw Ni' hman a ni ang. Beihruai hi kum 1918 June thla atanga hman tan a ni a, kum 1925 atangin September thlaah neih thin a ni ta a, kum 1947 atangin Nilai Zan Thupui Bu leh Beihruai Thupui hi bu khata siam tan a ni.

Synod Mission Board Secretary Rev. Lalchhuanmawia report ziah 'Synod Mission Board rawngbawlina tlangpui' tih chu www.mizoramsynod.org Download Section-ah dah a ni a, hetah hian Synod Mission Board Statistics thar ber (latest) dah tel a ni. Pi Laldawnkimi ziah 'Beihruai hman tan dan' tih chu www.mizoramsynod.org Article Section-ah en theih a ni bawh.

☐ **MSSU**

September 6, 2014 (Inrinni) hian Bawngkawn Chhim Veng Kohhranah Sunday School Zirtirtu Training neih a ni dawn a, hemi neihpui tur hian Pu John Lalhrualtuanga, MSSU Asst. Coordinator; Upa B. Lalhmunliana, Bethlehem Venglai leh T.Upa F. Lalenghluna, Ramhlun Vengthar (MSSU Trainers) te an kal ang. Zan Pathian biak inkhawmah Pu John Lalhrualtuangan fanau enkawl (Child Evangelism) chungchang thuchah a sawi ang.

☐ **Hruaina Eng FM Radio & TV Programme**

- ◆ **SEPTEMBER 5 (FM Zoawi Aizawl @ 7:30 p.m.) :**
Solo : Ruatdiki - Enna nunnem, **Choir :** Dawrpui Vengthar Bial Zaipawl- Hei chauh ka dil, **Thuchah :** Upa Lalrammawia Ngente - Tunlai khawvel leh kristian nun 2, **Solo :** Sawmtea- A mite tan, **Choir :** Saron Kohhran Zaipawl - Rorelna Dik
- ◆ **SEPTEMBER 5 (FM Lunglei @ 7:30 p.m.) :**
Solo : Ruatdiki - Enna nunnem, **Choir :** Dawrpui Vengthar Bial Zaipawl- Hei chauh ka dil, **Thuchah :** Upa Lalrammawia Ngente - Tunlai khawvel leh kristian nun 2, **Solo :** Sawmtea- A mite tan, **Choir :** Saron Kohhran Zaipawl - Rorelna Dik
- ◆ **SEPTEMBER 7 (TV Programme @ 3:00 p.m.) :**
Zaipawl : Zemabawk Pastor Bial Zaipawl - Chawlh hlan ka nghakhlel, **Documentary :** Tuithumhnar Bial, **Playback :** 21st Church Leader Counselling Training Kharna

☐ **Susamachar Prasaran Programme**

SEPTEMBER 7 (Pathianni) 5:00 pm. Hindi Gospel Programme (Susamachar Prasaran) :
Group/Choir/Solo : The Leprosy Mission Choir - Hame Sab Kuch Vo De Ta, **Group/Choir/Solo :** Chanmari Masihi Sangati - Mukti Dilai, **Sermon :** Lalramzauva - Apne Margong Ka Dhyana karo, **Group/Choir/Solo :** LH Hindi School - Yeshu MASIHI, **Group/Choir/Solo :** Venghnuai Kohhran - Milkar Hamm

☐ **Synod Moderator Programme**

- Synod Moderator Rev. K. Lalhmuchhuaka chuan tunkar tawpah hetiang hian hun a hmang ang :
- ◆ September 6, 2014 (Inrinni) Zan : Sesawng Mualmam Kohhran
 - ◆ September 7, 2014 (Pathianni) Chawhma : CTI Kohhran
 - ◆ September 7, 2014 (Pathianni) Chawhnu : Sesawng Vengthar Kohhran
 - ◆ September 7, 2014 (Pathianni) Zan : Sesawng Kohhran

SYNOD BU 2013

Synod Bu 2013 peih a ni tawh a, la lam lo Kohhran ten Synod Office-ah lam theih a ni e.